



Broj:01-02-957/17

Datum:31.05.2017.godine

Na osnovu člana 26. stav 2. i člana 74. Statuta Grada Sarajeva ("Službene novine Kantona Sarajevo", broj 34/08), Gradsko vijeće Grada Sarajeva, na sjednici održanoj 31.05.2017.godine, usvojilo je

### MIŠLJENJE

#### o prijedlogu Amandmana L do LV na Ustav Kantona Sarajevo u okviru javne rasprave koju provodi Skupština Kantona Sarajevo

Gradsko vijeće Grada Sarajeva je razmotrilo Amandmane L do LV na Ustav Kantona Sarajevo u okviru javne rasprave koju provodi Skupština Kantona Sarajevo, zajedno s Informacijom Gradonačelnika o aktivnostima u Kantonu Sarajevo usmjerenim na Ustavnu reformu i reformu lokalne samouprave sa stavovima Grada Sarajeva (koja je u prilogu ovog akta), te poslije provodene rasprave u radnim tijelima, u izuzetno kratkom roku, formuliralo stavove, odnosno primjedbe, prijedloge i sugestije kako slijedi.

1. Gradsko vijeće Grada Sarajeva ističe da se, razmatranjem ovih Amandmana i Informacije Gradonačelnika, prvi put pridružuje raspravi, odnosno odlučivanju u procesu Ustavnih promjena u Kantonu Sarajevo, a koje se vode vezano za status Grada Sarajeva, odnosno za provođenje presuda Ustavnog suda F BiH s cijem zaštite prava na lokalnu samoupravu u Kantonu Sarajevo, te cijeni da ovo mišljenje predstavlja i smjernice Gradonačelniku za dalje postupanje po predmetnom pitanju.
2. Gradsko vijeće Grada Sarajeva izražava nezadovoljstvo obimom i vremenom provođenja konsultacija vezanih za pripremu razmatranih Amandmana Vlade Kantona Sarajevo na Ustav Kantona Sarajevo, a posebno kada je u pitanju prekratak rok koji je Skupština Kantona utvrdila za javnu raspravu od svega 30 dana svojim zaključkom, broj 01-02-18341/17 od 10.05. 2017. godine, te upućuje zahtjev Skupštini Kantona Sarajevo da produži rok javne rasprave kako bi se Gradsko vijeće i općinska vijeća u Kantonu Sarajevo mogla, na odgovarajući način, odazvati javnoj raspravi.
3. Provodenje presuda Ustavnog suda F BiH, donesenih u procesu zaštite prava na lokalnu samoupravu u Kantonu Sarajevo, je neupitno, ali je Gradsko vijeće Grada Sarajeva stava da bi predlaganju Amandmana na Ustav Kantona vezanih za status Grada Sarajeva, trebala prethoditi široka javna rasprava u koju bi se, najmanje putem odgovarajućih anketa, uključili građani s područja Kantonu Sarajevo, a za što je, također, potrebno produžiti rok javne rasprave.
4. Gradsko vijeće Grada Sarajeva je mišljenja da rješenja iz Amandmana koje je utvrdila Vlada Kantona Sarajevo ne predstavljaju napredak u smislu provođenja Evropske povelje o lokalnoj samoupravi, presuda Ustavnog suda Federacije BiH, Ustava Federacije BiH i Zakona o principima lokalne samouprave na odgovarajući način, a posebno Ustavnog određenja o Sarajevu kao glavnom gradu.
5. Gradsko vijeće je mišljenja da je potrebno u Ustavu Kantona Sarajevo kroz pravne norme provesti status Grada Sarajeva kao glavnog grada Bosne i Hercegovine i Federacije Bosne i Hercegovine.
6. Gradsko vijeće Grada Sarajeva kao prilog javnoj raspravi o Amandmanima na Ustav Kantona Sarajevo, podržava pristup rješavanju problema iznesenih u razmatranoj Informaciji Gradonačelnika, uz naglasak na činjenici da je Sarajevo glavni grad Bosne i Hercegovine, glavni grad Federacije BiH i sjedište Kantona Sarajevo.

7. Gradsko vijeće je stava da se teritorij Grada Sarajeva treba proširiti na područje koje predstavlja jedinstvenu urbanu cjelinu kako je to uredeno u Amandmanu XVI na Ustav Federacije BiH, pa je to najmanje područje za koje se donosi Urbanistički plan za urbano područje grada Sarajeva (Grad Sarajevo, Općina Iličići i Općina Vogošća), ali je potrebno razmotriti i širi teritorij, teritorij svih devet općina u Kantonu Sarajevo, koje imaju vrlo određene potrebe za zajedničkim vršenjem poslova lokalne samouprave.
8. Gradsko vijeće Grada Sarajeva je stava da Ustavna rješenja trebaju postaviti okvir koji omogućava dalje konkretno postupanje, ka vraćanju poslova lokalne samouprave lokalnoj zajednici, donošenjem Zakona o lokalnoj samoupravi kojim bi se uredila osnovna podjela nadležnosti lokalne samouprave između Grada Sarajeva i općina u Kantonu Sarajevo. Ovo znači da je potrebno potpuno izostaviti djelokrug na način kako je to utvrđeno u predloženom Amandmanu LII dodavanjem članova 4 c), 4 d) i 4 e), budući da ovo nije sadržaj svojstven ustavnim određenjima, ne daje rješenja potrebna lokalnoj samoupravi u Kantonu Sarajevo u smislu jasne podjele nadležnosti (a čak sadrži i imperativne odredbe vezane za preuzimanje prava osnivača javnih komunalnih poduzeća).
9. Donošenjem odgovarajućih propisa o raspodjeli javnih prihoda i imovine stvorio bi se i materijalni osnov za vršenje ovih nadležnosti, a jasna i konkretna podjela poslova bi se dalje izvršila donošenjem zakonskih propisa po određenim oblastima i to tako da poslove lokalne samouprave, u najvećoj mjeri, vrše općine koje su i najbliže građanima, a da Grad Sarajevo vrši poslove od zajedničkog interesa za općine, a što proizlazi iz potrebe odgovarajuće funkcije jedinstvene urbane cjeline kako je to navedeno u Amandmanu XVI na Ustav Federacije BiH. Takvu raspodjelu nadležnosti prati raspodjela javnih prihoda kojima upravlja Kanton Sarajevo, a kojima se finansiraju poslovi lokalne samouprave, odnosno donošenje Zakona o lokalnoj samoupravi i Zakona o raspodjeli javnih prihoda u Kantonu Sarajevo, a u skladu s preporukama Evropske direktive.
10. Gradsko vijeće Grada Sarajeva je stava da Ustavna rješenja ne trebaju sadržavati elemente kao što je broj gradskih vijećnika, broj gradskih vijećnika koje bira svaka gradska općina, djelokrug Gradskog vijeća i Gradonačelnika, način izbora gradonačelnika i sl. Ova pitanja se uređuju Statutom Grada Sarajeva, a njihovom preciziranju bi morala prethoditi šira javna rasprava. Potrebno je naglasiti da rješenja iz Satuta Grada Sarajeva čine osnov za usklađivanje Izbornog zakona BiH.
11. Gradsko vijeće je stava da se norme iz Ustava BiH, odnosno Ustava Federacije BiH ne trebaju prepisivati u Ustav Kantona.

Iz navedenog, odgovarajuće rješenje Amandmana L po mišljenju Grada Sarajeva bi bilo:

**“Član 4a. Ustava Kantona Sarajevo, koji je dodat Amandmanom I na Ustav Kantona Sarajevo mijenjaja se i glasi:**

**(1) Varijanta I:**

U Kantonu Sarajevo općine Centar, Novi Grad, Novo Sarajevo, Stari Grad, Iličići i Vogošća, kao gradske općine koje su urbano i teritorijalno povezane svakodnevnim potrebama građana, čine Grad Sarajevo (u daljem tekstu: Grad) kao jedinicu lokalne uprave i samouprave.

**Varijanta II:**

*U Kantonu Sarajevo općine Centar, Novi Grad, Novo Sarajevo, Stari Grad, Iličići, Hadžići, Trnovo, Vogošća i Ilijaš kao gradske općine koje su urbano i teritorijalno povezane svakodnevnim potrebama građana, čine Grad Sarajevo (u daljem tekstu: Grad) kao jedinicu lokalne uprave i samouprave.*

**(2) Nadležnosti i odgovornosti Grada obuhvataju poslove gradskog lokalnog karaktera u sljedećim oblastima:**

- urbanog planiranja,
- stanovanja,
- finansija i porezne politike,
- zajedničke infrastrukture,
- javnog prometa,
- obrazovanja,
- kulture i sporta,
- iskorištavanja lokalnog zemljišta,
- lokalne radio i televizije,
- turizma,
- humanitarnih aktivnosti,
- lokalne uprave.

- (3) Poslovi gradskog lokalnog karaktera po oblastima, nadležnosti i odgovornosti Grada iz predhodnog stava ovog člana uređuju se, u skladu sa ovim Ustavom, Kantonalnim zakonima i Statutom Grada.
- (4) Statutom Grada uređuju se i pitanja od vitalnog načionalnog interesa, u skladu sa principima utvrđenim u Ustavu Bosne i Hercegovine, Ustavu Federacije Bosne i Hercegovine i Ustavom Kantona.

#### Obrazloženje

Ovim Amandmanom mijenja se član 4a. Ustava Kantona Sarajevo koji je dodat Amandmanom I na Ustav Kantona Sarajevo, a prije svega stav 1. kojim se vrši uskladivanje sa članom VI.B.1. Ustava Federacije BiH, a koji se odnosi na formiranje grada kao jedinice lokalne uprave i samouprave, pa tako i na Grad Sarajevo, što je podrtano i u Obrazloženjima presuda Ustavnog suda Federacije BiH U-18/09 (imovina) i U-21/09 (nadležnosti). Nadalje, izmjenama st. (2) i (3) rješava se pitanje nadležnosti i odgovornosti Grada Sarajeva. Također, na način koji je predložen, najvećim dijelom se uvažavaju specifičnosti povezanosti općina u Kantonu Sarajevo, jer su one neosporno urbano i teritorijalno povezane svakodnevnim potrebama i interesima građana, naročito komunikacijski i ekonomski, što je rezultiralo i povezanošću javnih gradskih službi (infrastrukture) i komunalnih sistema (voda, kanalizacija, gas, javni saobraćaj i dr.), a sve navedeno nesumnjivo predstavlja poslove lokalne samouprave.

**Odgovarajuće rješenje Amandmana LI po mišljenju Grada Sarajeva bi bilo:**

**Član 4b. Ustava Kantona Sarajevo, koji je dodat Amandmanom II na Ustav Kantona Sarajevo, mijenja se i glasi:**

- (1) Grad ima Gradsko vijeće čiji broj i način izbora se uređuju Statutom Grada Sarajeva.
- (2) Bošnjacima, Hrvatima i Srbima, kao konstitutivnim narodima, pojedinačno se garantuje najmanje 20% mjesta u Gradskom vijeću, a pripadnicima Ostalih najmanje 10% mjesta u Gradskom vijeću, bez obzira na izborne rezultate.

#### Obrazloženje

Izmjene koje se predlažu vezane su za izmjenu teritorije Grada Sarajeva.

Povećanjem broja gradskih općina, povećava se i broj gradskih vijećnika u Gradskom vijeću, a time i otvara prostor za brojčano većom zastupljenosti građana koji se izjašnjavaju kao Ostali, što se predviđa stavom 2. koji se predlaže.

**Amandman LII treba izostaviti po mišljenju Grada Sarajeva.**

#### Obrazloženje:

Predloženi novi član 4 d) tematski i nomotehnički pripada Zakonu o lokalnoj samoupravi, a ne Ustavu. Predloženi član 4 c) gotovo u cjelini predstavlja preneseno pravno rješenje iz Ustava Federacije BiH „što je nepotrebno ponavljanje već usvojenog pravnog rješenja iz pravnog akta veće pravne snage u hijerarhiji pravnih propisa BiH, Federacije BiH i Kantona Sarajevo. Osim

4

toga, unošenjem odredaba u Ustav Kantona Sarajevo koje već postoje u istom ili nešto izmijenjenom sadržaju stvara zabunu, jer je sasvim evidentno da postojeće pravno rješenje iz Amandmana II Ustava Kantona Sarajevo nije istovremeno, odnosno prethodno „brisano“. Predloženi član 4 e) sadrži imperativnu normu vezanu za obavezu preuzimanje prava osnivača nad kantonalnim javnim poduzećima, što je neprimjereno odnosu Kantona Sarajevo prema jedinicama lokalne samouprave, a pogotovo bez prethodnog razmatranja stanja po oblastima.

Gradsko vijeće je mišljenja da rješenja iz Amandmana koje je utvrdila Vlada Kantona Sarajevo ne predstavljaju napredak u smislu realizacije presuda Ustavnog suda Federacije BiH, vezano za zaštitu prava na lokalnu samoupravu u Gradu Sarajevo, posebno u oblasti komunalnih djelatnosti.

Gradsko vijeće Grada Sarajeva je stava da Ustavna rješenja trebaju postaviti okvir koji omogućava dalje konkretno postupanje ka vraćanju poslova lokalne samouprave lokalnoj zajednici, donošenjem Zakona o lokalnoj samoupravi kojim bi se uredila osnovna podjela nadležnosti lokalne samouprave između Grada Sarajeva i općina u Kantonu Sarajevu. Ovo znači da je potrebno potpuno izostaviti djelokrug na način kako je to utvrđeno u predloženom Amandmanu LII dodavanjem članova 4 c), 4 d) i 4 e), budući da ovo nije sadržaj svojstven ustavnim određenjima, ne daje rješenja potrebna lokalnoj samoupravi u Kantonu Sarajevo u smislu jasne podjele nadležnosti (a čak sadrži i imperativne odredbe vezane za preuzimanje prava osnivača javnih komunalnih poduzeća).

Donošenjem odgovarajućih propisa o raspodjeli javnih prihoda i imovine stvorio bi se i materijalni osnov za vršenje ovih nadležnosti, a jasna i konkretna podjela poslova bi se dalje vršila donošenjem zakonskih propisa po određenim oblastima i to tako da poslove lokalne samouprave u najvećoj mjeri vrše općine koje su i najbliže građanima, a da Grad Sarajevo vrši poslove od zajedničkog interesa za općine, a što proizlazi iz potrebe odgovarajuće funkcije jedinstvene urbane cjeline kako je to navedeno u Amandmanu XVI na Ustav Federacije BiH. Takvu raspodjelu nadležnosti bi trebala pratiti raspodjela javnih prihoda kojima upravlja Kanton Sarajevo, a kojima se finansiraju poslovi lokalne samouprave, odnosno donošenje Zakona o lokalnoj samoupravi i Zakona o raspodjeli javnih prihoda u Kantonu Sarajevo, a u skladu s preporukama Evropske direktive.

Tek tada slijedi, korak po korak, jasno utvrđivanje konkretnih poslova Grada, odnosno općina, a putem donošenja konkretnih zakona po pojedinim oblastima, pa tako i Zakona o komunalnim djelatnostima kojim će se utvrditi i način prenošenja nadležnosti, uključujući i odgovarajući pravičan odnos prema gradskim komunalnim poduzećima čija prava osnivača sada ima Kanton Sarajevo.

#### Iskazivanje rezerve Gradskog vijeća prema Amandmanu LV

##### Obrazloženje:

U dijelu člana 38. stav 2. - treba brisati tekst: "imaju pravo na pokretnu i nepokretnu imovinu" jer ova tematika ne pripada onome što ovaj član Ustava Kantona Sarajevo tretira, a to je finansijski aspekt funkcioniranja svih nivoa vlasti u Kantonu.

Problematika imovine općina u Kantonu Sarajevo i Grada Sarajeva, smisao mora biti tretirana izmjenom člana 39. Ustava, čime će se pristupiti realizaciji zadatoga u Presudi Ustavnog suda Federacije BiH, broj: 18/09 od 26.01.2010. godine u vezi sa Zakonom o imovini Kantona Sarajevo („Službene novine Kantona Sarajevo“, broj 6/97). U tom kontekstu Grad Sarajevo predlaže Kantonu Sarajevo izradu novog Amandmana vezanog za član 39. Ustava, unošenjem pravnih rješenja koja će biti na tragu spomenute Presude, odnosno rješenja koja će biti optimalna i zadovoljavajuća za imovinu i imovinske interese općina, Grada i Kantona Sarajevo i to u pogledu pravične raspodjele istih, između svih tijela vlasti u Kantonu Sarajevo.

## Prijedlog novog Amandmana

Dodaje se novi član 52. koji glasi:

Skupština Kantona Sarajevo će kantonalne zakone kojima je uređena lokalna samouprava i pripadnost javnih prihoda uskladiti s ovim amandmanima i njima urediti pitanja nadležnosti i odgovornosti Grada i općina, njihove međusobne odnose i način finansiranja.

### Obrazloženje:

Očekuje se kontinuiran nastavak uređivanja pitanja lokalne samouprave u Kantonu Sarajevo, te pripadajućih prihoda za vršenje poslova lokalne samouprave.

Ovakvim rješenjem se utvrđuje obaveza uskladivanja ili donošenja kantonalnog zakona kojim se uređuje lokalna samouprava u realnom roku i u kojem se trebaju precizno razraditi i utvrditi poslovi gradskog lokalnog karaktera po oblastima iz nadležnosti i odgovornosti Grada, potom poslovi općinskog lokalnog karaktera po oblastima iz nadležnosti općina u sastavu Grada, kao i općina izvan njegovog teritorijalnog obuhvata, način finansiranja, te i druga pitanja od značaja za funkcioniranje lokalne samouprave u cijelini, sve u skladu sa federalnim zakonima koji uredaju ove oblasti. Zakonom o lokalnoj samoupravi Kantona Sarajevo trebaju se definirati i rokovi za uskladivanje kantonalnih zakona iz pojedinih oblasti sa ovim zakonom, kao i rokovi za usklajivanje statuta Grada i općina sa tim zakonom. Istim zakonom se trebaju utvrditi i rokovi u kojim će se izvršiti preuzimanje poslova lokalne samouprave i sredstava za njihovo obavljanje od strane Grada i općina, te preuzimanje osnivačkih prava javnih preduzeća i javnih ustanova od strane Grada i općina, a sve to u odnosu na propisane rokove u kojima se moraju uskladiti zakoni iz pojedinih oblasti. Istovremeno, kantonalnim zakonima iz pojedinih oblasti treba utvrditi pripremu resornih ministarstava za provođenje predloženog amandmana, odnosno kantonalnog Zakona o lokalnoj samoupravi. Cijenimo potrebnim razmotriti i mogućnost podnošenja Amandmana na član 15. Ustava Kantona Sarajevo koji reguliše pitanje „prenošenja nadležnosti Kantona“, sve u svjetlu ovih amandmana i presuda Ustavnog suda Federacije BiH u vezi zaštite prava na lokalnu samoupravu.

U Informaciji Gradonačelnika koja je u prilogu ovog mišljenja, dato je i Obrazloženje pravnih osnova koje treba uzeti u obzir kod rješavanja statusnih pitanja za Grad Sarajevo, pri čemu se naglašava njegova uloga glavnog grada.

***PREDSJEDAVAJUĆI GRADSKOG VIJEĆA***

*Dr. Igor Gavrić, s.r.*



Broj: 01-GV-02-1079/19  
Sarajevo, 23.10.2019. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo“, broj 34/08) Gradsko vijeće Grada Sarajeva, na sjednici održanoj 23.10.2019. godine, donijelo je

**ZAKLJUČKE**  
**o stanju lokalne samouprave u Kantonu Sarajevo**  
**u okviru javne rasprave koju provodi Vlada Kantona Sarajevo**  
**o Nacrtu Zakona o lokalnoj samoupravi**

Gradsko vijeće Grada Sarajeva razmotrilo je Nacrt Zakona o lokalnoj samoupravi u okviru javne rasprave koju provodi Vlada Kantona Sarajevo, zajedno sa materijalom informacija za Tematsku sjednicu, te na tragu dosadašnjeg kontinuiranog zalaganja za iznalaženje cijelovitog, funkcionalnog i dugoročnog rješenja za lokalnu samoupravu u Kantonu Sarajevo, a poslije provedene sveobuhvatne rasprave o stanju lokalne samouprave u proteklom periodu, ali i danas, formuliralo zaključke kako slijedi:

1. Potrebno je da Skupština Kantona Sarajevo stavi van snage Amandmane L do LVII na Ustav KS – („Službene novine Kantona Sarajevo“, broj 31/17), te pristupi donošenju funkcionalnih amandmana na Ustav KS, koji su neophodni i koji bi utemeljili stvarnu reformu lokalne samouprave, kako je to Grad Sarajevo uvijek predlagao, a naročito da obrati pažnju na AMANDMAN L i zadovoljavajuće ustavno rješenje, a koje bi bilo sljedeće:

„Član 4a) mijenja se i glasi:

- (1) U Kantonu Sarajevo općine Centar, Novi Grad, Novo Sarajevo, Stari Grad, Ilidža i Vogošća, kao gradske općine koje su urbano i teritorijalno povezane svakodnevnim potrebama građana, čine Grad Sarajevo (u daljem tekstu: Grad) kao jedinicu lokalne uprave i samouprave.
- (2) Nadležnosti i odgovornosti Grada obuhvataju poslove gradskog lokalnog karaktera u sljedećim oblastima:

- urbanog planiranja,
- stanovanja,
- finansija i porezne politike,
- zajedničke infrastrukture,
- javnog prometa,
- obrazovanja,
- kulture i sporta,
- iskorištavanja lokalnog zemljišta,
- lokalne radio i televizije,
- turizma,
- humanitarnih aktivnosti,
- lokalne uprave.

- (3) Poslovi gradskog lokalnog karaktera po oblastima nadležnosti i odgovornosti Grada iz prethodnog stava ovog člana uredit će se u skladu sa ovim Ustavom, kantonalnim zakonima i Statutom Grada.

(4) Statutom Grada uređuju se i pitanja od vitalnog nacionalnog interesa u skladu sa principima utvrđenim u Ustavu Federacije i Ustavom Kantona\*. \*

2. Potrebno je izraditi i donijeti novi Zakon o lokalnoj samoupravi KS, utemeljen na novim amandmanima na Ustav KS kako bi se razradio pravni okvir Ustavom utemeljenih novih rješenja za lokalnu samoupravu u KS, a naročito definisali kriteriji za obavljanje poslova općinskog, odnosno gradskog lokalnog karaktera, sve imajući u vidu da uz te poslove idu i pripadajuća finansijska sredstva.
3. Radi potpunog uspostavljanja nove funkcionalne lokalne samouprave u Kantonu Sarajevo, potrebno je, u kratkom roku, uskladiti set zakona po nadležnostima resornih ministarstava, a koji su konačni tzv. lex specijalis za nadležnosti lokalne samouprave i time bi se zaokružila ova reforma, na zaista principijelan i funkcionalan način.
4. Potrebno je, prije svega, razumjeti da se uspješnost ove reforme ogleda u razumijevanju činjenice da se u Kantonu Sarajevo primarno radi o vraćanju poslova nadležnosti lokalne samouprave jedinicama lokalne samouprave u Kantonu Sarajevo, zajedno sa pripadajućim sredstvima za te poslove, a da to nije nužno prijenos nadležnosti koje su pripadajuće kantonima, odnosno KS.
5. Grad Sarajevo insistira i ovaj put na činjenici da je uvijek bio potpuno dobromjeran, u svojim stavovima, prijedlozima i mišljenjima i da se to podrazumijeva i ovaj put, te da se ne dovodi u pitanje pravo drugih nivoa vlasti da kvalitetno i odgovorno rade svoje poslove:
  - da Kanton Sarajevo donosi propise i nadzire njihovu primjenu;
  - da općine rade sve poslove općinskog lokalnog karaktera koje mogu u interesu građana, jer su najbliže građanima;
  - ali i da Grad Sarajevo bude zaista funkcionalan glavni grad i s tim u vezi vrši poslove gradskog lokalnog karaktera, one poslove koji su zajednički za sve općine i samim tim su pripadajući gradu.
6. Nakon usvajanja Amandmana na Ustav Kantona Sarajevo, potrebno je da Kanton Sarajevo doneše Zakon o reformi lokalne samouprave u Kantonu Sarajevo, kojim će se utvrditi dinamika aktivnosti na donošenju Zakona o lokalnoj samoupravi u Kantonu Sarajevo.
7. Gradsko vijeće Grada Sarajeva pokreće inicijativu prema Parlamentarnoj skupštini Bosne i Hercegovine i Vijeću ministara Bosne i Hercegovine za pristupanje izradi i donošenju Zakona o glavnom gradu Bosne i Hercegovine.



PREDSTAVAVAJUĆI GRADSKOG VIJEĆA

Dr. Igor Gayrić

\* Obrazloženje našeg prijedloga Amandmana I o Ustavu Kantona Sarajevo  
Ovim Amandmanom mijenja se član 4a. Ustava Kantona Sarajevo, koji je dodat Amandmanom I na Ustav Kantona Sarajevo, a prije svega stav 1. kojim se vrši uskladivanje sa članom VI.B.1. Ustava Federacije BiH, a koji se odnosi na formiranje grada kao jedinice lokalne uprave i samouprave, pa tako i na Grad Sarajevo što je podcrtano i u Obrazloženjima presuda Ustavnog suda Federacije BiH U-18/09 (imovina) i U-21/09 (nadležnosti).

Nadalje, izmjenama st. (2) i (3) rješava se pitanje nadležnosti i odgovornosti Grada Sarajeva. Također, na način koji smo predložili, najvećim dijelom se uvažavaju specifičnosti povezanosti ovih šest općina u Kantonu Sarajevo, jer su one neosporno urbano i teritorijalno povezane svakodnevnim potrebama i interesima građana, naročito komunikacijski i ekonomski, što je rezultiralo i povezanošću javnih gradskih službi (infrastrukture) i komunalnih sistema (voda, kanalizacija, gas, javni saobraćaj i dr.), a sve navedeno nesumnjivo predstavlja poslove lokalne samouprave.